

東
華
續
錄

東華續錄

臣王先謙

臣周瀚蕃恭校

乾隆三十八年癸巳春正月壬辰諭元旦升殿受賀在朝百寮及外藩陪臣例應以次分班行禮乃昨日朝臣班行禮畢階下已贊鳴鞭詢之禮部據稱高麗安南兩國陪臣已綴朝臣之末爲一班先期曾開入儀注進呈是以未經另摺具奏等語典禮專司不應顛預舛誤若此上年冬安南陪臣到京該部曾經具奏綴朝臣之末一同行禮此係隨時升殿謝恩朝臣員數多寡本無一定不妨因便帶領朝見若元旦正節大禮攸關中外觀瞻所屬藩國陪臣豈可與朝臣班聯參錯並無次第向以藩服來朝者眾若一分班臚贊未免需時曾命於朝臣班外將諸藩統列一班今該部乃

併此一班亦省入朝臣之班更不特摺請旨朦朧列入儀注內夫
所進儀注特係歲歲常行刊板不移之規自朕臨御三十八年以
來禮部所進儀注皆躬親素所熟嫻卽過壇廟大祀於一切
儀注亦不過舉手加額用展誠敬其閒儀文次第更無待逐一更
爲檢視也元旦眾臣朝朕之儀何用朕披覽將以朕之未經檢視
儀注爲不能勤政可乎如六曹奏牘本多內戶部刑部之事尤爲
殷劇其題奏之案朕惟就其有關節要者悉心斟酌若錢糧名目
字數案件彙結姓名又豈必逐一研討而後定其進止耶况專務
於此無論日不暇給並慮逐其末而忘其原大非愼憲救幾之道
於政要又復何裨禮部堂官等以似此朝會鉅典於常例有所增
損之處不爲妥議專摺請旨轉以列入儀注爲辭咎將誰諉著禮
部堂官明白回奏尋奏臣等因上年十二月皇上升殿請將安

南貢使入於百官班末行禮此次元旦朝會大典率將高麗安南
兩國陪臣隨班行禮載入儀注並未專摺奏明實屬糊塗應請嚴
議得旨交部察議○諭承德見在來京陛見看其器局小而不甚
曉事不稱巡撫之任廣西巡撫員缺著熊學鵬調補三寶著調補
浙江巡撫鄂寶前在巡撫任內尙無大過仍著補授山西巡撫伊
見在川省軍營辦理糧務其巡撫印務著巴延三暫行署理所有
陝西巡撫印務著畢沅護理○諭三和見在告假在家未能辦事
所有工部侍郎事務著高樸以副都御史署理向來巡撫回京應
補授三品京堂承德著卽署理副都御史○癸巳諭溫福奏提督
哈國興在軍營病故哈國興自前歲征剿緬匪以來頗屬勇往上
年調赴四川西路軍營擢任提督帶兵攻剿疊著勞績是以特加
恩授爲參贊大臣並將伊子用爲守備見在小金川全境蕩平正

值進勦金川需人之際倚任方殷遽聞溘逝深爲軫惜著賞銀一千兩存卹其家並加贈太子太保以示憫勞節終至意所有應得卹典仍著該部察例具奏尋予祭葬諡壯武○溫福奏金川黨惡助兇必當申討臣與阿桂豐昇額籌議臣由喀爾薩爾進兵阿桂由當噶爾拉進兵均攻噶拉依直擣腹心豐昇額由綽斯甲布進兵會同舒常徑攻勒烏圍制其要害見在商議陸續進發從前大兵未抵美諾及底木達之時小金川之南北境俱防賊番抄截今各寨落收服東南北三面已非應防之後路惟美諾係糧運總匯酌議留兵又曾頭溝堪卓溝木了山大板昭一帶路通金川且僧格桑原從底木達之美臥溝逃往恐賊酋見此路空虛從小路潛來滋事是以撥兵二千交董天弼分駐要隘並令其留駐布朗郭宗底木達等處防範後路至功噶爾拉係金川與小金川交界其

山與巴朗拉相似而較爲高峻地氣亦屬陰寒臣審度事機刻難延緩業於十二月二十二等日統兵啓行於簇拉角克溝之南帛噶爾角克礪之北覓路徑赴牛廠前進較之回赴美諾再趨功噶爾拉更爲便捷得旨所辦俱妥佇俟捷音○以甘肅提督馬全爲領隊大臣馳赴四川軍營○甲午舒常奏十二月二十日土司工噶諾爾布來營據稱索諾木畏懼已於本月十七日將甲爾壘地方綽斯甲布舊礪三座金川新礪三座及附近甲爾壘壩之斯根等處新舊礪五座一併退還見已派頭目土兵據守等語臣卽面諭以汝能實心出力督率土兵助攻將來受恩正多隨酌給獎賞諭軍機大臣等舒常奏索諾木將甲爾壘壩退出所辦深合機宜看來逆酋此舉自係聞大兵已破小金川卽日移兵分路進剿而綽斯甲布一路見有官兵督率土兵進攻其意妄以爲退還甲爾

壘壩可圖目前完事且俟大兵撤後復出而侵占豐昇額舒常卽
當明諭工噶諾爾布以此次進剿實爲眾土司剪除後患不滅不
休益堅其效順之心不復存顧畏之念方爲妥善惟是金川之番
賊較之小金川狡謀更深其於竊劫營盤抄截後路尤爲長技前
已詳悉傳諭溫福等加意豫防營中守禦宜嚴途次巡察宜慎使
賊眾技無所施或賊冒死而來卽當乘機盡殲大示懲創庶不敢
復爲輕視且官兵漸次深入後路尤關緊要一切餉道軍臺並須
實力守護儻賊眾潛伺我後萬一少有疏虞成何事體此一節所
關甚大溫福等各路均當留心規畫調度得宜勉之愼之○乙未
阿桂奏十二月二十二日據音吉圖汪騰龍等報稱攻得正地溝
口礮棚普吉保帶兵卽赴甲爾壘壩行至中途有綽斯甲布頭人
安布差人迎稟已得甲爾壘壩其地有礮六座見經綽斯甲布土

兵占據並據稱離此六七十里之協雅地方有碉三座我頭人生根亦已攻克等語臣思革布什咱一路原與綽斯甲布官兵共緞金川賊勢今既攻得正地溝口甲爾壘壩卽已控扼金川要隘各處防兵均可量爲裁撤惟查巴旺布拉克底之馬柰馬爾邦亦係乾隆十二三年進兵之路該處路通金川應撥兵千名駐守其餘官兵可酌分當噶爾拉綽斯甲布兩路俟議定具奏又奏查別斯滿地方共有五寨其二寨先經撫定此外三寨有兩金川賊人監守未敢遽投臣令已投番民前往招撫與監守賊番接仗其未投之番民從中接應殺死監守賊番據稱我等見雜谷百姓自改作屯練土司不敢欺陵今止求改作屯練不願分給各土司等語其所請實出真情臣等見已准行又奏奉諭旨以綽斯甲布一路進兵須臣阿桂前往臣豐昇額於各處番情均屬初辦再工噶諾爾

布固爲逆酋親戚至如索諾木之母之妻皆係布拉克底土舍安多爾之姊之女見在金川其安多爾又娶索諾木之姑見在布拉克底均係世爲婚姻臣豐昇額卽帶領當噶爾拉一路官兵亦須駕馭巴旺布拉克底之人始得其力彼中情形尙未深悉况小金川旣滅又分道進攻金川臣豐昇額統兵分剿則金川之不滅不休工噶諾爾布諒亦可揣而知見在舒常在綽斯甲布兩月有餘於該處事宜漸已熟悉今若令臣豐昇額督率此路官兵令舒常參贊軍務可期得力况臣等原定三路中之工噶爾拉當噶爾拉兩處皆爲進擣噶拉依之兵綽斯甲布一路爲進擣勒烏圍之兵者原以噶拉依一帶地勢更險攻剿多費兵力至綽斯甲布一路則一得達爾圖日旁山梁向前賊境皆勢居下游稍易攻取三路中不論何處得手則他處均可得力臣等已撥定官兵日內卽當

起程若再行會商更調恐於進剿稍稽得旨所奏俱是佇候奮勉
成功以待酬庸茂典○戊戌溫福奏十二月二十六日抵功噶爾
拉山下牛廠地方見牛廠之前功噶爾拉之下有大卡五座當派
兵四千分爲兩隊乘夜雪攻撲賊遂逃赴功噶爾拉碉卡內併力
拒守查功噶爾拉峰巒劍立與巴朗拉路頂宗相似惟中有了口
如一綫羊腸碉卡排立仰攻非易且連日嚴寒積雪深至四五尺
官兵見已占住半山俟礮到糧敷卽相機前進報聞○己亥諭軍
機大臣等曾頭溝一路向來董天弼由此進兵今小金川全境雖
已蕩平而此一帶實爲官兵後路萬一逆酋潛令賊眾由黨壩軼
出抄截我後或於糧運軍臺略有疏誤成何事體再昨據溫福訊
取齋稟賊眾供詞內有僧格桑由美臥溝逃往金川後將此路隘
口用樹木捆斷等語此甚可疑雖賊酋懼官兵追剿堵截路徑使

我無從躡迹但此等要隘之處我進較難賊出甚易安知非賊首詭計藉攔阻追兵爲名俟官兵一過仍由美卧溝口而出復占據布朗郭宗底木達等處所關不小溫福等恩恩進兵於此緊要關鍵未能籌度萬全朕偶念及心中甚爲不懌劉秉恬已授爲總督見駐美諾辦理一切軍務而董天弼見亦署理四川提督且曾由曾頭溝一帶進兵地利亦爲熟悉今又駐布朗郭宗等處經理降番諸事所有防範機宜乃伊二人專責著傳諭劉秉恬董天弼將美卧溝及曾頭溝兩路酌量形勢選幹練備弁帶兵駐守以防賊眾軼出滋事其有類此要隘之處並須詳悉籌度一體妥辦但見存美諾一路兵數無多尙恐不敷撥派川省各營尙有可調之兵卽著劉秉恬等悉心籌議若見今防範甚嚴可以毋庸調兵則可若稍有不放心處不妨將應行添兵若干一面檄調一面奏聞以

期萬妥其各路糧臺軍站並遵照前旨派委妥員往來加意巡查

勿稍疏懈溫福等各路亦當留心防察總期於事有益不可惜費

將此由六百里加緊一併傳諭知之○以敦福爲湖北布政使農

起爲湖南按察使

由鹽道遷

○庚子阿桂奏抵僧格宗後派土兵等往

探勘得自納木覺爾宗溝口上山約行四十餘里卽係納圖納扎

木自此向北上山約三十餘里大嶺一道遠與功噶爾拉相連卽

係當噶爾拉爲金川界址山勢極峻堅碕十四座排立兩峰丫口

閒守禦甚密一得此嶺則金川各處皆出其下但嶺下險坡有林

箐二十里冰雪頗大再進卽金川之克舟九寨等處地稍寬敞查

僧格宗河東河西地方及汗牛十四寨雖均投順究係新經撫定

而此一帶通金川之路又多且僧格宗納木覺爾宗係糧運總匯

已派大員經理留兵防範臣帶領漢土兵一萬二千餘人前進又

奏近令巴旺布拉克底番人往探得索諾木居住噶拉依其兄喇嘛莎羅奔等皆在勒烏圍僧格桑攜妻妾至彼隨行尙有二三百人同住勒烏圍官寨莎羅奔傳進眾頭人商議時有山丹綽爾嘉勒係郎卡手下年老頭人言天朝來勦小金川爾等幫同抗拒今又收留僧格桑必不肯饒此時速行送出庶幾免罪其餘眾人言僧格桑本屬一家來此投生如何可以送出莎羅奔從眾留住等語查從前郎卡欲以索諾木承襲土司大頭人中有言不應立者郎卡置之於死今索諾木雖爲土司頭人未必悅服以情勢揆之金川必終歸殲滅得旨今固不敢爲滿足之言若賴上天慈恩速成此事實千古未有之績也勉之以待酬勲厚典○甲辰諭富勒渾查審阿爾泰貽誤軍務及勒屬派買短發價值得受屬員餽送收回應扣養廉各款俱已自認不諱實出情理之外阿爾泰前

在山東巡撫任內頗能察吏安民實心任事因擢授四川總督初至川省於地方政務尙屬認真是以加恩簡任綸扉仍膺封疆重寄至小金川與沃克什構釁一節朕以疊觸相爭自屬番夷常事原可無庸問罪興師且阿爾泰業已奏明親往查辦因其老成歷練必能妥協經理遂不復爲廬念乃阿爾泰親見僧格桑之桀驁不馴並及早籌辦以除兇孽轉將沃克什地方斷給小金川致逆豎得以藉口益肆鴟張漫無顧忌阿爾泰惟圖遷就完事仍以僧格桑遵約歸巢之詞欺飾入告而於金川之父子濟惡槩不置問旣將土司印信輕給郎卡及索諾木遣人赴藏仍復給照護行益爲逆酋所藐視兩金川遂爾狼狽爲奸梗化拒命是兩金川之事阿爾泰實爲禍階及伊前歲來京陛見朕以其事屢加面詢阿爾泰一味含糊粉飾而於兩逆酋之狂悖不法及索諾木欲吞併

各土司侵至維州橋之語並皆匿不奏聞設彼時卽於朕前陳述
得以洞悉其情雖初意不欲興兵而知其事難輕結必爲籌制幾
先使兩酋不得句連逞惡不待其逆蹟昭著大煩師旅此又阿爾
泰養癰貽患之罪也然朕猶不加嚴究僅罷伊總督之任並念其
宣力有年在川最久特賞散秩大臣銜在軍營督辦糧運俾得自
效後桂林因罪罷職復令阿爾泰署理督篆亦以其爲輕車熟路
冀可收效桑榆乃伊仍不知感激圖報當大兵深入之際於接運
糧石動輒稽延甚至遇有軍營催糧公牘妄以受代爲詞竟不拆
閱其罪尤無可逭然朕亦不卽加窮究卽上年夏閒福隆安命往
四川查審桂林一案其時並未疑及阿爾泰或有劣蹟交其密爲
查訪迨回至熱河覆命以阿爾泰近日庸謬誤事迥不類其平日
所爲因詢其精力是否比前衰邁據福隆安奏阿爾泰精力尙覺

照常惟在川時聞伊子明德布干與公務與屬員交結之事亦未
卽深信但地方大臣果至縱容子弟滋事營私於吏治甚有關繫
隨諭文綬就近訪查及文綬顛覆奏朕亦不加深詰及川東道
託隆來京令軍機大臣詢以阿爾泰任內之事託隆隨將伊勒派
屬員代買物件短發價值並多辦幫木肥己及收受馬權朝珠等
款開出朕尙以託隆係福隆安一家亦未肯遽爲憑信因卽交軍
機大臣詢問伊子明德布於託隆所開款蹟一一直認並非得自
刑求是阿爾泰之在川狼藉已無疑義復據文綬查出原任藩司
劉益將阿爾泰捐辦木植養廉暗爲繳送甚至將庫項那用攤扣
屬員養廉苦累商民等款尤可駭異但文綬於奉旨之初有心袒
徇不卽據實查出及復交令覆查料明德布在京必皆供吐難以
再爲掩飾始行和盤托出是文綬不過小有才之人後此之續參

適以顯其前此之欺飾不得因此稍爲解免昨已明降諭旨至劉益因阿爾泰屢次面爲保奏是以擢用藩司不意彼此通同弊混假汲引以便其私圖則阿爾泰之罪更萬難輕道矣今軍機大臣會同三法司覈議富勒渾原奏將阿爾泰照有心貽誤軍機例擬以斬決於罪固爲允當但阿爾泰前此之希圖了事因循諱飾究因朕不欲窮兵黷武屢諭就事妥辦遂爾意存將就尙非伊之敢於逞私憤事朕惟自咎初辦之過於姑息以謝天下不肯諉過於阿爾泰朕於賞罰權衡一本大公至正况事關軍務乎惟是阿爾泰經朕加恩簡任總督擢授大學士乃竟老而貪得易轍改弦變受所屬多贓甚至懷私薦舉藉以侵動庫項似此蠶食不飭若復貸其一死將何以任用督撫使知儆惕乎但念其曾任大學士加恩免其肆市賜令自盡卽著富勒渾傳旨監看以爲大臣負恩貪

續者戒餘依議並將此通諭中外知之○庚戌諭軍機大臣等前以兩金川賊眾恃險拒守其槍礮所用火藥鉛丸產於何地或購自他處抑由內地偷漏各情節會諭前任總督文綬查辦具奏其覆奏亦未明晰而軍營所訊俘獲番眾供詞言人人殊茲澤旺解送到京訊據供稱小金川素不產硫磺其鉛斤向來原有鉛礦在美諾僧格宗相近之勒博地方從前曾經開過因開採後年歲不好遂卽封了後來所用鉛斤係購自木坪三雜谷等處至金川向有磺廠其鉛子間於附近之綽斯甲布等處購買等語木坪三雜谷綽斯甲布等處俱係內地土司兩金川所用火藥卽使未用兵以前陸續購買亦不能豫備數年之用其中自不無番夷私行偷賣今小金川全境蕩平該處向日所用火藥鉛丸如何製購無難確詢得實如勒博等地境果產有鉛斤硫磺等項可供製配火藥

者卽當就近採辦應用可省內地遠道解運之煩更屬便益著傳諭劉秉恬卽速查明妥辦據實具奏至金川所用鉛鐵既有員自綽斯甲布之供尤宜設法嚴禁况見由此路進兵軍火所需更關緊要且綽斯甲布隨征土練等各有應給備用火藥鉛丸恐該處番人等於關支後私行省減轉售賊番則與藉寇兵而齎盜糧何異更不可不加意嚴防著並諭豐昇額舒常曉諭該土司嚴飭各土練等懍守法度不得將火藥鉛丸絲毫偷漏致干重咎豐昇額仍於軍營嚴密訪察如查有偷賣之事卽行盡法嚴懲以示炯戒並著劉秉恬於附近金川賊境各處飭屬實力嚴查申禁不可稍有疏懈將此遇軍報之便一併諭令知之尋劉秉恬奏澤旺所供鉛礮據思巴寨寨首溫布稟稱澤旺父湯朋曾於科多橋地名安博落山空過尙有舊礮基址等語查安博落在美諾僧格宗之間

看來卽係澤旺所供之勒博地方已飭調工匠試採如果苗旺卽當趕製鉛丸以資軍火至番夷私行偷賣之弊已嚴諭金川連界各土司毋許偷漏違者卽寘嚴刑並懸立重賞傳諭帶兵頭人等徧示諸蠻令互相覺察如有能告發私賣子藥鉛鐵者賞銀一百兩俾知所賞倍於所賣當必爭相查訐不嚴自絕報聞○癸丑溫福奏功噶爾拉了口賊碉雪深路險必須分路進攻正月初九夜普爾普額森特帶兵直抵了口賊碉堅固未能攻克維時烏什哈達德爾森保等左右兩翼亦至山梁將賊番分防之卡全行奪獲隨卽分拏卡柵以偪賊碉又將運到之四將軍礮位儘力轟擊並連夜移前敵大營於新卡總匯要路以防乘閒衝劫報聞○甲寅諭軍機大臣等昨溫福奏索諾木差人遞到番字稟帖於僧格桑逃往金川之說全不提及轉自誇其兵力強於各土司冥頑無知

已極可惡甚至請內地大臣或差官員往彼議事冀欲羈存爲質公然以敵國自居尤屬狂悖不法而稟內稱其父郎卡爲納木喀濟雅勒布妄談悖逆更爲覆載所不容查納木喀濟雅勒布卽西番語之天汗其意以爲番語非中國所能通自矜得意豈知我國家中外一統西北關地二萬餘里累譯皆通而西藏喇嘛久隸天朝凡西番字語內地素所通曉此等鬼域伎倆其將誰欺况郎卡么膺雜種僅若螻蟻前此大兵進剿埽穴無難朕念其歸命投誠宥其大罪仍賞給土司郎卡尙不得擬於天朝臣僕之列何得以天汗爲稱至索諾木童年兇悖禽獸不如乃於稟內不稱父名妄加名號又自稱莎羅奔掌印土司而隱匿其名種種違悖天理不過自取滅亡將軍等卽將朕此意繕給回文嚴切問罪卽微末兵弁亦不可遣令前往墮其術中各路官兵更宜迅速攻剿以靖邊

氛再黨壩地界與豐昇額軍營相近尤當加意防範以備逆西竄

出卽時擒縛並嚴諭郭羅克毋得藏匿致速罪戾○乙卯調李宗

文爲禮部右侍郎

署兵部侍郎

○戊午諭阿桂著補授禮部尙書阿桂

未到任之前著素爾訥署理其戶部尙書事務著永賁署理

二月庚申朔諭各督撫甄別特用道府人員○嚴定外省官員失

察子弟干與公事處分○壬戌諭睿親王多爾袞當世祖章皇

帝冲齡踐阼時攝政有年威福自專不能恪盡臣節身歿之後因

其屬人首告經諸王大臣定罪除封成案具在第念我朝定鼎之

初睿親王實先統眾入關肅清京輦檄定中原前勞未可盡泯今

其後嗣廢絕而瑩域之在東直門外者歲久益就榛蕪亦堪憫惻

著交內務府派員前往相視其牆屋傾頽者酌加繕葺仍爲量植

松楸並准其近支王公等以時祭埽用昭朕篤念成勳瑕瑜不掩

東華續錄

乾隆七十七

十一

之至意○諭軍機大臣等據舒赫德奏稱巴木巴爾回至游牧酌
酒虐下種種乖張當經嚴札訓飭等語巴木巴爾人本蠢頑舒赫
德既行申飭可密令雅郎阿等加意看守如不知悛改伊屬下人
或有窮迫逃避違抗等情殊不成事見係耕作之時巴木巴爾不
遵期奉行亦屬無濟伊既欲往伊犁不如暫且留住伊子達木拜
扎勒桑稍知道理令雅郎阿挑好宰桑令其遵奉指示妥爲耕種
孳養牲畜儻渥巴錫策伯克多爾濟等不知辦理原由妄生疑懼
舒赫德可將此明白曉諭咸令知悉○朝銓因病解任以喀爾崇
義爲盛京刑部侍郎○癸亥諭勒爾謹奏巴里坤地方近來生息
增繁兵民子弟敦書講射漸已蔚然可觀請照烏嚕木齊迪化甯
遠二廳封題代試之例專設學額一摺已批交該部議奏矣自平
定西陲以來關外耕屯日聞商旅往來生聚滋繁久已共安作息

其秀民並知蒸蒸向化絃誦相聞漸成樂土前已議准辦事大臣所奏於烏魯木齊等處專設學額今巴里坤復請照例取進生童將來人文日盛卽當建置膠庠使遐方文德誕敷聲教廣被實從來所未有惟是該處民居稠密閭井殷繁兼之屬國來王征輶輻輳實爲邊陲一大都會今旣議定學額而原駐僅一同知尙於體制未合自應將巴里坤改設爲府烏魯木齊改爲屬州或將安西府移於巴里坤而改安西爲州並令統隸於邊郡規模尤爲閎遠其應如何定制設官酌予嘉名及建立學校之處著大學士九卿詳悉妥議具奏尋議查安西府距嘉峪關不遠應改爲直隸州將所轄淵泉縣裁原轄玉門敦煌二缺仍爲屬縣巴里坤改設知府添附府知縣一員烏魯木齊同知改爲知州原設甯遠城通判改爲州同特訥格爾縣丞改爲州判附近之闢展同知哈密奇台兩

通判均歸巴里坤新設知府管轄所有改設府州縣應予嘉名伏
欽定得旨如所議行 欽定府曰鎮西州曰迪化縣曰宜禾
○諭嗣後大計之年督撫等於藩臬考語另摺奏明毋庸於本內
夾單著爲令○甲子 上御經筵○乙丑軍機大臣等議覆安徽
學政朱筠條奏搜輯遺書事宜一漢唐遺書已少遼宋金元之經
注文集及九流百家子餘史別苦無刊本請購取官鈔等語應遵
奉前旨如係家藏未刊之書繕錄副本將原本給還仍令各省妥
協蒐採一宋臣鄭樵作圖譜金石二略歐陽修趙明誠則錄金石
叢崇義則錄圖譜並爲考古依據請兼收圖譜一門將各省所有
鐘銘碑刻拓取彙選查古今金石源流可供考證者具在至山林
荒寂之所必令官爲拓取恐致紛擾毋庸瀆辦一前明永樂大典
一書陳編羅載請擇其中若干部分別繕寫以備著錄查此書原

共二萬二千九百餘卷一萬一千九十五冊就原書目錄檢查其中不恆經見之書頗有若槩不分別選擇殊非採訪遺書本義應揀派修書翰林逐一查校如有實無傳本而各門湊合尙可成書者摘開書名伏候訓示一前代校書著錄如七略集賢書目崇文總目等編俱可師法應令儒臣於每書校其得失撮舉大旨敘於卷首以便觀覽查宋王堯臣等崇文書目晁公武讀書志就所藏書籍編次目錄另爲一書最爲簡當應倣其體例分經史子集詳載部分卷數撰人姓名垂示久遠得旨軍機大臣議覆朱筠條奏內將永樂大典擇取繕寫各自爲書一節議請分派各館修書翰林等官前往檢查恐責成不專徒致歲月久稽汗青無日蓋此書移貯年深旣多殘缺又原編體例分韻類次先已割裂全文首尾難期貫串特因當時採摭甚博其中或有古書善本世不恆見今

就各門彙訂可以湊合成部者亦足廣名山石室之藏著卽派軍機大臣爲總裁官仍令翰林等官內選定員數責令及時專司查校將原書詳細檢閱並將圖書集成互爲較覈擇其未經採錄而實在流傳已少尙可裒輯成編者先行摘開目錄奏聞候朕裁定其應如何酌定規條卽著派出之大臣詳細議奏至朱筠所奏每書必校其得失振舉大旨敘於本書卷首之處若欲悉倣劉向校書序錄成規未免過於繁冗但向閱內府所貯康熙年間舊藏書籍多有摘敘簡明略節附夾本書之內者於檢查洵爲有益應俟移取各省購書全到時卽令承辦各員將書中要指彙括總敘厓略黏貼開卷副葉右方用便觀覽餘依議○丙寅諭據阿桂等奏進攻金川當噶爾拉山梁於正月二十日分路派兵乘風雪前進奪其大小石卡十座用礮轟斃賊眾甚多二十四日晚復派兵分

路攻擊殲其大頭人二名小頭人四名並槍斃屍三十餘具負傷者五十餘名各等語此次官兵進剿當噶爾拉雖未能全克賊寨而阿桂等調度有方帶兵之將領俱能奮勇出力奪碉殲賊甚屬可嘉阿桂明亮著交部議敘其在事之將領弁兵著阿桂等查明覈定功績等差咨部分別議敘○庚午諭昨據軍機大臣議覆朱筠條奏校覈永樂大典一摺已降旨派軍機大臣爲總裁揀選翰林等官詳定規條酌量辦理茲檢閱原書卷首序文其言採掇蒐羅頗稱浩博謂足津逮四庫及覈之書中別部區函編韻分字意在貪多務得不出類書窠臼是以踳駁乖離於體例未爲允協卽如所用韻次不依唐宋舊部惟以洪武正韻爲斷已覺陵雜不倫况經訓爲羣籍根源乃因各韻軫轉於易先列蒙卦於詩先列大東於周禮先列冬官且採用各字不論易書詩禮春秋之序前後

錯互甚至載入六書篆隸真草字樣撫拾米芾趙孟頫字格描頭
畫角支離無謂至儒書之外闕入釋典道經於古柱下史專掌藏
書守先待後之義尤爲鑿柄不合朕意從來四庫書目以經史子
集爲綱領裒輯分儲實古今不易之法是書旣遺編淵海若准此
以採擷所登用廣石渠金匱之藏較爲有益著再添派王際華裘
曰修爲總裁官卽會同遴簡分校各員悉心酌定條例將永樂大
典分晰校覈除本係見在通行及雖屬古書而詞義無關典要者
不必再行採錄外其有實在流傳已少其書足資啓牖後學廣益
多聞者卽將書名摘出撮取著書大指敘列目錄進呈候朕裁定
彙付剞劂其中有書無可採而其名未可盡沒者止須註出簡明
略節以作流傳考訂之用不必將全部付梓副朕裨補闕遺嘉惠
士林至意再是書卷帙如此繁重而明代廠役僅閱六年今諸臣

從事釐輯更係棄多取少自當剋期告竣不得任意稽延徒誚汗
青無日仍將應定條例卽行詳議繕摺具奏尋議上得旨將來辦
理成編時著名四庫全書○辛未命阿桂議政處行走○壬申以
嵩貴爲內閣學士

由詹事還

○甲戌諭大藏經中呪語乃諸佛祕密心

印非可以文義強求是以槩不緝譯惟是呪中字據當時譯經者
僅依中華字母約略對音與竺乾梵韻不啻毫釐千里之謬甚至
同一漢字亦彼此參差卽如納摩本音上爲諾牙切下爲模倭切
而舊呪或作曩謨或作奈麻且借用南無者尤多皆不能合於正
其他牽附乖離類此者難以縷數嘗命莊親王選擇通習梵音之
人將全藏諸呪詳加訂譯就正於章嘉國師凡一句一字悉以西
番本音爲準參之蒙古字以諧其聲證之國書以正其韻兼用漢
字期各通曉編爲四體合璧大藏全呪使唄唱流傳脣齒喉舌之

開無爽銖黍而於呪語原文一無增省且按全藏諸經卷帙編次
字樣並爲標注以備檢查書旣成序而壽之剞劂列爲八函茲裝
潢藏工若交該處查明京城及直省寺院向曾頒過藏經者俱各
給發一部俾緇流人眾展卷研求了然於印度正音本來如是不
致爲五方聲韻所淆庶大慈氏微妙真言闡揚弗失不可謂非震
旦沙門之幸若僧徒等因傳習已久持誦難以遠調憚於改易字
音者亦聽其便將此傳令各僧眾等知之又諭大藏漢字經函刊
行已久而蒙古字經亦俱繙譯付鐫惟清字經文尙未辦定揆之
闡教同文之義實爲闕略因特開清字經館簡派皇子大臣於滿
洲蒙古人員內擇其通曉繙譯者將藏經所有蒙古字漢字兩種
悉心校覈按部繙作清文並命章嘉國師董其事每得一卷卽令
審正進呈候朕裁定今據章嘉國師奏稱唐古特甘珠爾經一百

八部俱係佛經其丹珠爾經內有額訥特珂克得道大喇嘛等所傳經二百二十五部至漢字甘珠爾經則西方喇嘛及中國僧人所撰全行列入今擬將大般若大寶積大集華嚴大般涅槃中阿含等經及大乘律全部繙譯其五大部支派等經八種並小乘律皆西土聖賢撰集但內多重複似應刪繁就簡若大乘論小乘論共三千六百七十六卷乃後代祖師在此土撰述本非佛旨無庸繙譯等語所奏甚合體要自應照擬辦理粵自白馬馱經梵文始傳震旦其間名流筆授展轉相承雖文字語言未必卽與竺乾悉協然於佛說宗旨要不失西來大義逮撰集目錄者以經律論區爲三藏於是大乘小乘衰集滋繁且於佛經外兼取羅漢菩薩所著贊明經義者以次類編入部在西土諸佛弟子尙係親承指授或堪羽翼宗風洎乎唐宋以降緇徒支分派別一二能通內典者

輒將論疏語錄之類覲得續入大藏自謂爲傳燈不墜甚至拉入塔銘誌傳僅取鋪張本師宗系乖隔文離與大慈氏正法眼藏去之愈遠殊不思此等皆非佛說真言列入續藏內已爲過分豈可漫無區別如章嘉國師所云實釋門之公論也昔我 皇考曾命朕於刊刻全藏時將續藏中所載叢雜者量爲刪訂嗣朕卽位後又令大臣等復加校覈撤去開元釋教錄略出辨僞錄永樂序讚文等部其錢謙益所著楞嚴蒙鈔一種亦據奏請毀撤所有經板書篇均經一體芟汰期於激聞宗門茲清字經館正當發凡起例之始如不立定規條致禪和唾餘剽竊亦得因緣貝夾淆亂經函轉乖敷揚內典之指可將章嘉國師奏定條例清單交館詳晰辦理並傳諭京城及直隸各寺院除見在刊定藏經毋庸再爲刪削外嗣後凡別種語錄著述止許自行存留儻有無識僧徒妄思衰

輯彙錄詭稱續藏名目覬欲竄潛正典者俱一槩永行禁止庶幾
梵文嚴淨可以討眞源而明正見但此事關繫專在釋教毋庸內
閣特頒諭旨著交與該管僧道處行知各處僧綱司令其通飭僧
眾人等永遠遵行○禁各省商籍人員毋得服官本土○阿桂明
亮奏納扎木靠西山梁前經官兵占據見又令伍岱等設法拏卡
再行進逼二月初二日子刻伍岱等帶兵三百乘賊不覺奪據礪
前山梁見拏卡二座卡牆一道距賊甚近俟新鑄礮運至梁上望
東平打旣爲得力而德赫布等所帶之兵又順山梁自南而北向
上合力轟摧賊礪自難支守一得此礪卽可審察情形繞截賊後
報聞○乙亥諭宋元俊本一綠營武弁因其久在川省稍悉番情
當小金川用兵之初伊率眾前往克復明正侵地尙知奮勉是以
由遊擊洊擢總兵用示鼓勵乃伊險詐性成自以旣叨委任遇事

意存取巧全不實心自效且於墨壘溝貽誤之後惟恐日久情形
顯露因爲先發制人之舉於上年五月內與阿爾泰會參桂林乖
張欺罔各款情節甚爲重大經朕特派福隆安前往審訊則所奏
多屬捏飾而宋元俊平日臨陣換戴小帽以避賊人槍擊至薛琮
失陷一節桂林曾派令帶兵往援以無路可進爲詞竟行退回又
欲改由革布什咱取道亦遷延未往又於參奏之後向王萬邦恐
嚇改供且教令彼此串寫字帖爲據並宣言我若不參倒桂林必
令我帶陝甘兵前去若去就同薛琮一揀不去必被參劾各情節
俱行逐一究出是其設心傾陷天良盡喪實出情理之外是以質
訊確實卽傳諭令將宋元俊革職拏問並將伊任所原籍家產貨
財抄出以申軍紀尋因福隆安阿桂摺奏宋元俊尙習番地情形
軍營見資驅策若令其帶罪自效俟將來功過相抵或可收效桑

榆因復降旨加恩將伊原籍查出家產給還並仍留其總兵之任俾知感悔圖報乃伊賈盈罰亟爲天理所不容旋卽自行病斃猶念其身旣歿其前次一切罪狀姑且置之不問原屬格外從寬至薛琮等被困桂林旣派宋元俊帶兵往援乃竟逗遛未進桂林因何不卽將伊據實參奏實不解其何意曾諭令舒赫德俟桂林到伊犁時嚴訊確供具奏今舒赫德奏到訊據桂林供桂林一聞薛琮告急卽派宋元俊帶兵齎糧星夜赴援宋元俊以該處山勢陡險難進爲詞稟稱必須從布拉克底與金川交界之所帶革布什咱土兵從山梁壓下較爲得力桂林卽飭作速起身伊仍遷延不進桂林未能卽時參奏實屬糊塗錯謬等語宋元俊若當桂林派往救援卽從薛琮原路統兵急進賊眾聞我援兵聲勢自必望風解散薛琮等未嘗不可全師而還孰意其惟圖自全坐視不救是

薛琮及官兵二千餘人之命皆由宋元俊一人甘心膜視所致言之實堪痛恨使其身尚在卽立行正法已不足以謝臨陣捐軀之眾若因已伏冥誅猶任其子孫得以保守家業國法安在且見值官兵進剿之時信賞必罰乃軍行第一要義儻於此等有心詭怯誤公之人更加曲貸將何以激勵我將士使人人皆知用命乎著高晉卽將宋元俊二子宋粦宋魯拏解刑部治罪如宋粦尙未自川回籍卽著川省及沿途督撫於所到之處查拏解部其原籍家產高晉卽行嚴密查抄其任所貲財著富勒渾一併查辦毋任少有隱匿寄頓俾在營將弁兵丁等共知身受國恩良心不容自昧雖一時物故暫稽刑法而日後罪狀盡出亦必難邀寬典凡有敵愾致身之義者可不憬然猛省勉圖實殫心力以期功成受賞身名俱泰乎將此通諭川省各路軍營咸令知悉○丁丑戶部議准

本部侍郎蔣賜棨奏關差赴任向在戶部請領精微批文一道由戶科挂號請用 御寶以杜假冒實緣明季稅差雜出莫可稽考相沿至今無裨實政宜刪去以符體制從之○己卯諭軍機大臣等據陳輝祖奏湖北鄖陽施南二府所屬向多荒地近年戶口日繁流寓人眾所在開墾緣不諳定例未盡隨時報升科則請令民間自行首報分別升科並請將從前督臣永常所議封禁官荒之處均令停止等語民間開墾荒地自應查明按例呈報升科豈宜任其因循違限至從前永常封禁官荒一節伊本不明事理所辦原屬拘泥方今生齒繁滋地利所有自必趨之如鶩且見在即有私墾之事可見前此之官爲封禁仍屬有名無實又不若聽其耕闢升科俾小民獲自然之利而在官復有籍可稽較爲兩得陳輝祖所奏亦屬應行但止令自行首報不復官爲覈驗愚民惟利是

務誰肯全數開呈弊將百出若止係型多報少尙屬藏富於民亦可不計正恐因有隱匿之事地方里正遂爾串通胥吏藉端挾制魚肉鄉愚或遇不肖有司甚至從中染指於政體大有關繫不可不慎之於始自非官爲查丈不能徹底清釐而查丈之事亦非易辦如找繩略有鬆緊量弓稍有敲斜積少成多畝數卽因之增減是又當董以公正明察之大員親履實勘使無絲毫隱漏方爲萬妥然水清無魚朕亦不肯因辦此一事致閭閻或至見絀甯可於丈清之後酌爲百姓留其餘經官明給不愈於民間之私相欺匿陰滋流弊乎此時若卽交陳輝祖查辦自必秉公經理但伊籍隸湖南與湖北究屬同省未免關礙鄉情卽有掣肘之處且恐無知之徒從而妄生議論於陳輝祖亦甚不便此事本非急務是以諭令暫行停止將此旨交軍機處密記陳輝祖原摺一併鈔存於富

勒渾回任後再行傳諭知之○辛巳溫福梅蘭察奏功噶爾拉賊
砌牆堅凍滑賊番自恃負隅若拘定進攻實爲非計查昔嶺一路
從前由噶爾薩爾前往計程三站若從額森特所經固木布爾山
進抵木果木止須一日臣溫福見由此路赴彼親爲察看額森特
駐兵昔嶺之下離賊寨甚近已運大礮二尊轟擊由木果木山梁
回看功噶爾拉丫口反在背後丫口以下有巴都智固德爾拉三
卡過此方抵喀爾薩爾均可指數木果木前山巖俱經官兵占據
由儘北一股而下卽係昔嶺山腳其中一股可至色爾里寨南一
股卽功噶爾拉賊番後路噶拉依雖隔山溝據番人指點方向相
去約不過四五十里臣等悉心商酌功噶爾拉派李煦常保佳帶
兵三千防守仍似大兵在彼時晝夜摧擊木果木北面山梁派德
爾森保多隆武帶兵一千二百防駐簇拉角克一帶派張大經帶

兵五百防駐以期迅擣賊巢不致株守無益報聞○癸未諭軍機大臣等昨溫福奏功噶爾拉賊碉難以立時攻破因帶兵至木果木山梁會同海蘭察等攻勦昔嶺而留派德爾森保多隆武李煦常保住等各帶兵分駐等語溫福相度機宜故爾分兵另勦朕按圖察看我兵業已深入後路各處均關緊要賊匪本屬狡詐不敢明爲接仗或乘閒由大兵之後前來偷襲亦不可知殊爲慮念德爾森保多隆武旣派令防守木果木之北面山梁此一帶卽伊等專責儻賊棄碉突出殺之甚易著傳諭德爾森保等時刻留心瞭望毋稍忽略致干咎戾其功噶爾拉碉卡久經溫福進攻自不可忽然中止致賊酋知我分兵但仰攻較難而賊眾伺隙壓下頗易且竊劫營寨是其長技尤不可不防李煦及常保住在彼照常轟擊不過牽綴賊勢原非藉其果能攻克但駐兵三千儘足以資防

守儻有疏虞則李煦等之獲罪不小著傳諭伊等務須實力奮勉勿自貽誤昨已諭令劉秉恬帶兵五百於帛噶爾角克簇拉角克等處駐守此兩處距木果木後山梁不遠而功噶爾拉地方劉秉恬又曾親至其地照應均爲便易著劉秉恬於帶兵移駐之便先往木果木後山梁及功噶爾拉兩處察看情形與德爾森保李煦等詳悉講論如有應辦事宜面爲商定妥協調度仍卽據實覆奏以慰廑念總之不責伊等以攻勦而責伊等以守禦毋致溫福等有後顧之慮是卽伊等之功勉之慎之尋劉秉恬等奏查木果木後山梁在溫福軍營之北翻過山梁溝內卽德爾森保等駐紮之地該處東北直接金川之勒物溝設卡五處其附近隘口安卡二十二處分布巡防至賊人所據丫口在功噶爾拉軍營之頂我兵於山腰設有石卡每日用礮轟擊復於左右緊要處所排列卡隘

二十九處防範嚴密不致賊人有掩襲之事得旨覽奏俱悉○甲申豐昇額舒常奏連日派侍衛富爾賽巴三泰等由達爾圖大碉正面進攻侍衛彰鼐佛倫泰等由大碉之東西進攻侍衛烏爾圖納遜提督馬彪等帶兵接應十二日黎明一齊擁上賊番見勢急有由碉卡溝壕內逃出者俱被官兵擊斃當令佛倫泰等帶兵五百名向西橫進作取徑欲上之勢賊番驟有二百人從達爾圖山梁前來向西抗禦復經擊斃三十餘人見令舒常分兵潛往日旁會合音吉圖等擊其不備臣豐昇額仍設法攻取報聞○乙酉諭圖桑阿奏武職自副將以下守備以上請照文職丁憂等語夫父母之喪解任丁憂係人子各盡孝道亦應視事之當然酌辦文職例應丁憂亦有經該督撫奏請在任守制者因伊等情願方如此辦理武職自參將以下職分較微得項無幾遇有喪事回籍

服滿引見未免徒勞往返定例各員本籍丁憂與在任丁憂均屬一體在任丁憂卽爲不孝回籍丁憂卽爲孝乎圖桑阿係滿洲臣僕不守樸實舊習舞文沽名殊屬不堪著嚴行訓飭○丙戌命瑋古泰在內閣學士上行走

原任盛京戶部侍郎

○署戶部尚書永貴奏查八

旗恩監例監止准考試中書筆帖式及繕本帖寫筆帖式其咸安宮學宗學覺羅學教習向不與考請嗣後如有通曉繙譯之恩監例監一體送考於學校似爲有益從之○己丑諭據劉秉恬奏將軍溫福見在取道進攻昔嶺迅速移營但道路初開恐糧運稍有稽遲卽日馳赴木果木大營山功噶爾拉一帶地方沿途查辦將道路設法開修臺站妥爲安設並催趲在途米石速赴軍營接濟等語所辦甚好昨因溫福業已進兵諭令劉秉恬於軍營適中之地帶兵防駐並令先往木果木及功噶爾拉兩處察看情形今尙

未接奉前旨一聞溫福移營之信卽迅速前往與朕所降諭旨適合可嘉之至劉秉恬向在軍機處行走有年久經歷練而又不肯稍存畏難之見不辭勞瘁動合機宜深得大臣實心體國之道實能副朕委任深用嘉慰似此勤勞軍務卽與統兵督戰無異劉秉恬著交部照軍功議敘以示優獎

三月庚寅朔日有食之○壬辰 上啓鑾謁 泰陵○諭朕此次

祇謁 泰陵禮成取道畿南恭奉 皇太后安輿巡幸天津閱視

河工所經過地方及天津閩府所屬俱著蠲免本年錢糧十分之

三○癸巳 上閱永定河隄○丙申諭據阿桂等奏於二月二十

五日夜分兵四路攻取賊礮三寶綬庫等在納圖西邊山散一路

領兵拔開木柵躍過深濠推倒石牆並將北面礮根刨挖毀拆砍

殺賊眾五十七人頭人克窩一名遂將自西而東之第五礮占住

其東面各碉賊入前來接應抗拒者又被官兵槍箭殺死四十餘名納圍納扎木兩路亦擊死賊人二三十名並搶獲軍械等物所有賊碉聯絡之勢見已中斷仍設法繞截分攻等語均屬奮勇可嘉而攻碉殺賊則三寶綏庫等尤爲勇敢三寶綏庫等著交部從優議敘阿桂明亮調度有方其餘各將領亦俱奮勇出力均著交部議敘並著阿桂將在事將領弁兵等實在出色應加鼓勵者查明奏聞交部分別查辦○丁酉 上謁 泰陵○諭溫福等奏於二月二十五日分兵五路攻取昔嶺賊碉內額森特巴雅爾率領官兵進攻第九第十兩碉將火彈拋入賊碉乘賊驚潰官兵一擁向前殺賊四十餘名餘俱被火燒斃又海蘭察與額森特烏什哈達普爾普馬全阿爾素納復合力連攻數碉賊退避碉內因借撤回之勢引賊出碉回身殺死一二百人並獲口糧鉛藥等物見已

奪住九十兩礮仍乘勝攻勦等語此次官兵不避槍石破礮殺賊均屬可嘉其中海蘭察額森特巴雅爾烏什哈達普爾普馬全阿爾素納尤爲奮勇出力著交部從優議敘溫福董率有方其餘將領亦俱奮勇均著交部議敘其官兵內有實在出色應加優獎者並著溫福查明分別咨部查辦以示鼓勵○戊戌 上命簡親王豐訥亨恭奉 皇太后自暢春園啓鑾○免蹕路所經之宛平等二十州縣及天津府屬各州縣三十三年至三十六等年逋賦○己亥免直隸三十三年至三十五等年逋賦○河東河道總督姚立德奏山東運河經明臣宋禮用老人白英之策築壩濟運功業不朽雍正四年敕封宋禮爲甯漕公建祠以其子孫世襲生員奉祀敕封白英爲永濟之神配食乾隆三十年賞給白英子孫世襲八品頂帶查宋禮典崇專祀其子孫自應一例給與八品頂帶以

隆崇祀得旨允行○庚子 上閱視淀河○諭今日閱視淀河內
鷹鷂壩及鹿疇兩處應添引河工程其鹿疇引河據周元理擬挑
九百丈已足資取直之益自應卽如所擬行至鷹鷂壩曲處該督
止擬開挑引河一百二十七丈渠西河頭仍恐射隄彎處不能引
溜歸槽著向西北展長百十丈則大隄不致受頂衝以資保障河
防原以衛民惟期盡善卽爲費較多亦所不靳著周元理卽照指
示機宜動帑妥協辦理仍飭大員董率稽查務令工歸實濟民資
利賴○甲辰減直隸軍流以下罪○乙巳 上奉 皇太后駐蹕
天津府○丙午 上閱駐防兵○諭朕於祇謁 泰陵禮成後便
道閱視河工恭奉 皇太后安輿巡幸天津距京師不過數程較
之熱河道里尤近非若巡幸他省可比如河東總河及山東河南
二省巡撫以壤地相接就近奏請觀光原爲合理卽如鹽政織造

等呈進備賞之物亦尙有因至各省督撫等差人齎摺請安已可
不必乃督撫等竟相率進獻方物甚屬無謂念其遠道而來已費
跋涉難以槩行屏卻因量收食物數種以備隨營賚予但封疆大
臣惟當善體朕心似此非禮之禮實所不取嗣後凡朕巡幸近畿
各督撫務恪遵此旨不得復有進獻將此通諭知之○丁未豐昇
額舒常奏攻撲達爾圖大碉官兵奮勇進至半坡侍衛佛倫泰等
首先砍斷木欄藍翎侍衛富爾賽等卽擲火彈將護碉短牆攻破
賊番驚竄俱被官兵擊斃隨進攻前面大碉雪深冰滑難以措手
賊番在壕中抗拒自午至酉殺賊約八九十名弁兵閒有傷損臣
舒常攻取日旁派領侍衛普濟保等直抵壕邊用噴筒火彈傷斃
溝中賊番碉卡內槍石緊密復派參將馬應詔帶兵從北澗箐林
中夾攻斃賊三四十名報聞○己酉 上奉 皇太后自天津回

鑒○賜召試舉人杜兆基內閣中書生員顧堃等舉人○免通州
寶坻等九州縣三十六年逋賦○庚戌論文安大窪連絡四淀向
來積水難消前此會命協辦大學士公兆惠往勘設法疏治水卽
退涸三十二年經行閱視業已徧種春麥彌望青蔥省視實深欣
慰迨三十五年巡閱所經又多積水此次所見仍復汪洋一片若
久遠難以涸出恐妨民業致完無田之糧朕心深爲軫念特命周
元理查明水占頃畝錢糧數目並交軍機大臣將作何籌辦之處
會同該督覈奏茲據奏稱此項窪地每遇積水未消時村民捕魚
爲業水涸後普種稻粱卽成沃壤是以從前康熙年間甫經題豁
錢糧旋即陸續報墾請復蓋小民旣資爲恆產不肯輕棄其業卽
水占未涸尚可收魚蝦之利若將糧額槩行豁除則水涸人思報
墾轉無定界易啓爭端等語所奏雖屬近理但念各業戶等所有

地畝本藉耕藝資生若積水占田糧從何出雖該處賦則本輕水
小時尚可佃漁覓利究不若力田收穫之多備令照常輸將民力
仍不免拮据自應查明分別酌辦以恤民艱嗣後著將此窪地視
積水之多寡以定賦則之等差水大則全行豁除水小則量爲減
賦若水涸耕種有收仍按額徵輸如此則恆業不致有失而民力
並得常舒俾瀕窪黎庶永沐恩膏共臻安阜以示觀民行慶至意
其如何查覈地畝納糧確數酌定章程仍著周元理派委明幹大
員實力詳查妥議覆奏○壬子 上閱永定河下口隄○吏部議
准伊犁將軍舒赫德奏涼莊地方移駐京兵旗民雜處防守彈壓
經理需員應設理事通判一員定爲簡缺歸部揀補從之○甲寅
上幸南苑行圍○乙卯吏部議准御史沈咸熙奏定例同知直
隸州推升知府遇有六不勝任者改爲加一級仍同本任查同知

係府佐聞曹尙可黽勉供職直隸州知州刑名錢穀本有專司又有表率稽查之責與知府職任相同未便以不勝知府之員仍留直隸州之任應令該督撫詳加考覈或酌以對品同知改補以重官方從之○丙辰 上奉 皇太后還京師

閏三月庚申朔以瑪興阿爲禮部侍郎○壬戌阿桂明亮奏當噶爾拉山梁前於所克第五碉設立營卡橫斷賊碉尙未扼其要害若將靠西山梁第一雙碉之東二碉攻得則納扎木三四兩碉更易攻取再將緊接納圍之第八碉占據六七兩碉左右皆是營卡賊勢更孤當撥官兵於二十一日夜間陸續分進潛至各碉崖礮之下賊番立柵防守官兵拔柵過濠攀援直上賊番紛紛潰逃被官兵追殺百餘其進攻第八碉及攻靠西山梁第二碉官兵未能速克因日午冰融暫行撤回已將所得碉卡拆毀派兵拏卡與前

所得第五礮聯絡駐守其迤東迤西各礮即可相機進攻報聞○

乙丑兵部議准大學士兩江總督高晉奏江西甯州與新昌縣交界之黃岡洞周圍百餘里前明寇盜盤踞嚴行封禁深險曲邃難保不藏匿奸匪應於新昌之老屋場雙港口三峰嶺鵝公嶺甯州之麻崧山老鴉山正岡山小西坑八處各設卡房一座巡兵五名以資防守又稱該處界在兩邑易滋推諉請將洞內專屬新昌洞外民山專屬甯州統歸銅鼓營同知管轄從之○丁卯諭軍機大臣等據彭寶奏譯出緬匪回信並訊取蠻羈供情一摺緬匪狡詐百端本不足信且得魯蘊尙未復至老官屯又未給有孟矣回信其遞來之字係苗溫出名而蘇爾相所具稟詞仍係蓋拉機授意尤不足憑此時總宜付之不理不必給與回檄使之無從窺測至所云求大人們差一明白人賞一明白字其說更屬荒唐切不可

墮其術中又云聞天朝見在辦理軍務要調四十萬兵進木邦各路某處若干造船一千隻直下阿瓦緬國誰人敢當等語名爲畏懼天朝其實深知官軍不習彼處水土而天時瘴癘又不相宜必不能在彼久留爲攻圍之計且從前我兵攻老官屯將士得病者多旋即退撤賊匪皆所熟悉故欲以此示怯聳我進兵彼得坐收以逸待勞之利斷不可爲其所愚至於乘便伺隙以出奇襲擊止可俟將來相度機會而行此時無庸辦理若云盼望開關貿易思享太平亦不過蠻地人民私見則然未必真出緬酋本意或其承管頭目希冀於中覓利亦未可定彼旣以此爲言惟當嚴飭各關隘加緊巡邏勿使貨物絲毫偷漏或亦控制之一法至昨歲得魯蘊差孟矣等進關懇求原說將羈留內地之人全行送還並進貢乞降果如所言尙可將就完事今忽改作僅送回蘇爾相多朝相

二人其局如何可了恐緬匪竟送蘇爾相等回內地並附有貢物
彰寶不得主意臨時始行請命轉爲所笑著傳諭彰寶如果緬匪
將蘇爾相送到時止將蘇爾相等收留其貢物不拘多少仍行發
還諭以從前緬酋憎駮差人至老官屯軍營納款原稱將阿瓦所
留內地官員等槩行送回仍納貢請罪彼時據情奏聞蒙大皇帝
格外矜宥俯俞所請嗣以該酋杳無音信逾四月之久本督部院
恐干欺罔咎愆因遣蘇爾相等齎書詰問該匪目等竟敢將蘇爾
相多朝相拘留其情固爲可惡但此僅係本督部院所委偏裨尙
與全局無涉非若楊重英等內地官員爲緬匪所掠入在阿瓦羈
留也楊重英等在內地原屬無關輕重之人但緬酋敢於久拘不
遣實屬頑梗抗違如果全行送還尙得謂之誠心悔罪因而進貢
輸誠大皇帝原許網開一面宥其前非仍准開關交易使爾等共

享安恬今乃以蘇爾相等搪塞此輩末弁尤非所必需業經奉有
諭旨本督部院不便因此瀆奏至中國富有四海何物不得豈屑
視爾小邦貢器爾若全還內地之人具貢請罪或可鑒爾悃忱代
爲進獻今復悔前說僅送回一二弁員是匪酋尙未知獲罪之由
豈可便令進貢所有貢物仍飭令付來人齎回並爲明白曉諭爾
果欲求弛禁如常交通貿易非將楊重英等梟行送回難於允准
勿再以此等詭計輕於嘗試也利害爾自擇之如此檄諭且視其
舉動若何再行奏聞定奪至蘇爾相多朝相送同時均應解京質
訊多朝相不過微末土弁且係隨蘇爾相同行無足深責止須照
常押送若蘇爾相身係都司乃任賊拘繫覲顏苟活此次具稟非
但聽賊指揮且措詞用意隱欲爲緬匪卸罪該員在老官屯兩年
之久或竟至降賊亦未可知其情罪實爲重大自應嚴加鎖紐選

派幹員管押解京仍飭委員沿途小心防範勿致疏縱將此由六
百里傳諭知之○庚午吏部議准江西巡撫海成奏查九江府所
轄五縣地處衝繁爲江西水陸通衢僅設同知一員難以兼顧瑞
州府地僻政簡僅轄三縣設有同知一員近駐銅鼓營足資彈壓
其通判一員同在郡城所管水利儘可歸併同知辦理請將瑞州
府通判改爲九江府水利通判殊有裨益從之○辛未吏部議准
御史唐淮奏御史一官由編修及各部郎中員外保送郎中員外
自額外主事游升歷俸已久惟編修等官一經授職定例卽准保
送未免俸淺資輕應俟散館後俸滿三年方准與送以抑躁進從
之○丁丑予金川陣亡襄陽鎮總兵馬虎祭葬入祀昭忠祠

夏四月庚寅命內閣學士博清額赴四川軍營○庚子諭此次

常雩大祀豫期詣 皇穹宇拈香仰瞻 列祖神牌見有字色模

糊之處諭交太常寺堂官查辦乃該堂官止將上年冬至祭祀時恭請出龕入龕之祀丞任策祥送交刑部治罪而刑部亦並未切實根究僅以任策祥照律問擬顙頂具奏朕夙知郊壇大典非一祀丞專司其責恭請神牌係捧爵贊禮郎之事且其日卽經德福奏稱向例如是何得僅諉之微末祀丞而置贊禮郎於不問必係德福袒護滿員希圖蒙混了事因令軍機大臣詳悉查詢始據德福稱恭請神牌出龕入龕係祀丞任策祥其自供案請入亭內恭昇至壇及祭畢由壇迎奉供案係贊禮郎珠通阿並查明珠通阿係原任副都統雅爾呼達之孫是德福之意存袒庇已屬顯然而素爾訥當德福面奏時亦在旁與聞其說何亦隨同附和乎朕臨御三十八年辦理庶務從不肯稍涉含糊亦無人能於朕前取巧欺飾德福何人竟敢以此嘗試耶此案若非朕洞鑒

其隱則任策祥獨當重罪而珠通阿竟因堂官袒庇得以脫然事
外何以服任策祥之心而使太常寺官員知所儆懼縱以任策祥
過或無心不卽如部議正法秋審時亦不予勾而臨期綁赴市曹
其驚悸亦去死無異朕綜理庶獄凡笞杖小罰尙不使其稍有枉
縱况大辟重犯乎朕嘗讀唐史云人君無不銳始而工於初其半
稍怠卒乃瀟漫不振朕嘗引以爲戒今朕雖逾六表而精力強盛
如常不憚萬幾之勞動嘗欲俟八旬以後春秋漸高酌量精神視
古帝王耄期倦勤之義或可稍安頤養而此時正振作有爲之日
方當乾惕日加勵精求治不肯纖毫自懈大臣中或有高年者亦
當體朕之用心服勤勿怠所謂莊敬日強堂廉交儆之道亦正在
此所有任策祥珠通阿一案見令軍機大臣審擬具奏另降諭旨
將此通諭中外知之尋議奏壇官任策祥珠通阿應依大不敬律

治罪堂官素爾訥德福請旨治罪其餘新舊各堂官交部嚴加議處得旨任策祥珠通阿俱著從寬改爲應斬監候秋後處決德福素爾訥著革去花翎仍交部嚴加議處永貴及其餘太常寺堂官俱著交部分別嚴加議處○己酉以阿揚阿署刑部侍郎榮柱爲廣東按察使由郎中遷○庚戌諭索琳前以戶部侍郎與署侍郎博清額前往土默特查審事件未能妥協是以將伊革去侍郎降爲內閣學士令其在軍機司員上行走嗣因駐藏需員復給與副都統銜前往辦事乃於民人杜華身死不明一案部議請革去職銜彼時因索琳駐藏在外當經降旨俟其更換回京之日再降諭旨後又因藏內及前在浙江藩司任內例應議處三案共應降七級調用均聲明換班回京之日請旨今經兵部彙案具奏索琳著銷去副都統銜加恩授爲內閣學士革職留任俟八年無過准其開復

所有禮部侍郎員缺仍著索琳暫行署理○命署禮部侍郎索琳
軍機處行走○辛亥命慶桂以理藩院侍郎副都統爲伊犁參贊
大臣○壬子准渥巴錫游牧移居珠勒都斯並給口糧籽種銀兩
○調譚尙忠爲廣東按察使榮柱爲河南按察使○甲寅諭州縣
擬重罪過輕部駁改正者實予降調無庸仍委覆審○戊午諭內
外大臣中有奉職恪勤敷歷宣勞並見在軍營督師轉餉勞績懋
著者宜晉宮銜以示優眷大學士溫福戶部尙書舒赫德工部尙
書福隆安俱加太子太保禮部尙書王際華工部尙書裘日修俱
加太子少傅禮部尙書阿桂署兵部尙書豐昇額直隸總督周元
理閩浙總督鍾音四川總督劉秉恬俱加太子少保

五月己未朔諭朕幾餘懋學典冊時披念當文治修明之會而古
今載籍未能蒐羅大備其何以裨藝林而光冊府爰命四方大吏

加意採訪彙上於朝又於翰林院署舊藏明代永樂大典其中墜簡逸篇往往而在並敕開局編校爰蕪取腴每多世不經見之本而外省奏進書目名山祕笈亦頗夏括無遺合之大內所儲朝紳所獻計不下萬餘種自昔圖書之富於斯爲盛特詔詞臣詳爲斟酌釐其應刊應鈔應存者繫以提要輯成總目依經史子集部分類聚命爲四庫全書簡皇子大臣爲總裁以董之閒取各書繕閱有可發揮者親爲評詠題識簡端以次付之剞劂使遠近流傳嘉惠來學其應鈔各種則於雲集京師士子中擇其能書者給札分鈔共成善本以廣蘭臺石渠之藏全書卷帙浩如煙海將來皮弄宮庭不啻連楹充棟檢玩爲難惟搗藻堂向爲宮中陳設書籍之所牙籤插架原按四庫編排朕每憩此觀書取攜最便著於全書中擷其菁華繕爲薈要其篇式一如全書之例蓋彼極其博此取

其精不相妨而適相助庶縹緲羅列得以隨時流覽更足資好古
敏求之益著總裁于敏中王際華專司其事書成卽以此旨冠於
舊要首部以代弁言○辛酉諭工部尙書瑛曰修品學端醇才猷
練達入直內廷屢膺使命宣力年久倚任方深今春偶患噎隔特
遣太醫院堂官診治復常遣御前侍衛前往看視比因病體加劇
奏請解職未允所請並賜詩示慰昨又降旨晉加宮銜俾之舒心
攝養以冀速痊茲聞溘逝深爲悼惜著加恩派散秩大臣一員帶
侍衛十員往奠茶酒所有在任革職降級之案俱著開復其應得
卹典仍著該部察例具奏尋予祭葬諡文達○以嵇璜爲工部尙
書由工部郎遷○甲子以巴彥學爲左副都御史由通政使遷○丙寅 上
奉 皇太后啓鑒秋獮木蘭○免經過地方本年額賦十分之三
○壬申 上奉 皇太后駐蹕避暑山莊○乙亥以謝墉爲工部

侍郎

由內閣
學士遷

○丙子阿桂明亮奏查西山梁第三礮山陰下有山

骸一道賊番據此地架柵築卡一路直接山梁大礮互爲應援係
賊要地初三日有賊百餘下壓我兵分兩翼夾擊連斃數人初五
日乘賊不備進擊直逼礮根侍衛科瑪等帶兵用刀斧砍斷木柵
推牆擁入立將頭人砍死餘賊盡殲生擒六殺死四十三遂乘勢
攻撲連接石卡又殺賊二十餘忽林箐中有賊約三四百來援俱
被擊退竄入礮柵堅守勢難遽克以次撤兵隨有二十餘賊出礮
至濠邊計圖衝壓被我兵槍箭擊斃一半餘俱遁入固守報聞○
丁丑諭從前因烏嚕木齊駐防滿洲綠營兵丁曾放參贊大臣管
轄俱聽伊犁將軍調遣今烏嚕木齊所屬地方寬闊而距伊犁遙
遠兵民輻輳應辦事繁將參贊大臣一缺改爲都統一員於管轄
兵丁辦理諸事尤爲有益而於體制亦屬相符索諾木策凌在烏

嚕木齊辦事以來尙屬盡心妥協竭力奮勉卽著補授烏嚕木齊都統嗣後作爲烏嚕木齊都統缺仍屬伊犁將軍節制聽其調遣所有應奏應辦之事一面奏聞一面知會伊犁將軍仍著交該部另行改鑄都統印信發給○己卯猛遮土目叭立齋等率屬內附○辛巳諭軍機大臣等本月二十日在京所發本報應於二十一日巳午之間遞至熱河行在今於二十三日辰刻始行遞到較常遲隔兩日查係因懷柔密雲一帶水發所阻見值三伏雨水原所時有懷柔密雲各處橋梁道路自應隨時查察料理以利通行未便任其阻滯但該縣等職分輕小其餘武職員弁未免呼應不靈勒昌道駐紮昌平距懷柔不遠該道並無緊要事務必須在署坐辦若令暫駐懷柔亦與昌平無異著傳旨令盛佳卽移駐懷柔並於密雲一帶往來查察如遇軍報本報或偶因雨水閒阻懷柔原

有繞道可行密雲白河亦有上哨據處可渡該道卽督率地方員弁悉心照料妥辦毋致再有延誤嗣後朕夏間駐蹕熱河總派霸昌道留駐懷柔一帶辦理○丁亥諭據彰寶奏請將車里司宣慰土缺裁汰於其地改設專營移駐都司守備撥兵巡防等因一摺所見甚是車里土司設立之初原因其率屬投誠頒給印信號紙授以宣慰之職遞傳四輩前此莽匪滋擾該土司刀紹文懦弱無能躲避獲罪雖經革退仍令其子承襲已屬格外施恩今刀維屏無故棄地潛逃實係自行滅絕斷不應令其再襲並據該督查十二猛各土職俱非頒給印信號紙土司若於此內選擇一人升襲未必遽肯受其鈐制自應將車里宣慰司卽行裁汰改設專營移駐都司等官帶兵鎮守兼轄十二土弁於邊境夷情更爲得要且於高爽瘴輕之地建立衙署營房自不慮其沾染瘴癘而近邊干

把兵丁與彼水土素習較由他處撥往者自更相安卽所需移駐之守備都司亦可擇各員中之能耐瘴氣者前往酌定分年輪換於事尤爲有益況前有宣慰土職時內地兵役常往勒索近經彰寶查明俱卽正法此後兵丁等自更知畏懼而有專營大員在彼駐守其餘彈壓稽查亦必倍加嚴密無慮復有擾累土境之事至該土司所屬夷民或可做照川省屯兵之例量給口糧令其一體當差防守伊等自必共知感奮出力所有安營設官及酌改兵屯各事宜並著彰寶詳悉妥議具奏○以李友棠爲內閣學士由宗人府遷府丞○戊子戶部議奏藩司到任委員盤查所屬倉穀宜定期限前議令各該督撫按本省情形定限具奏各省陸續奏到殊不畫一定例督撫到任盤倉不計道路遠近倉儲多寡統以三箇月爲限嗣後各省藩司到任委盤應照督撫例勒限三箇月盤清結報

至廣東各府或稱數多或稱途遠又甘肅之安西府及哈密等處離省更遠應令該省扣除委員赴盤程途日期外勒限三箇月結報福建之臺灣府應照廣東之瓊州扣程勒限奉天未設藩司據府尹奏請令治中知府赴盤定限自一箇月至兩箇月不等應如所奏再督撫藩司到任同時或相隔未久尙在限內者或適值年例盤查者併案聲明結報藩司盤查後卽遇升調新任藩司到任在三箇月內者加印結詳報均無庸重盤藩司署任未及三月者統歸接任藩司查辦至雲南四川江西未據議奏該三省情形大約相同亦請照三箇月限期結報以昭畫一從之

六月甲辰諭本朝朱彝尊日下舊聞一書博採史乘旁及稗官雜說薈萃而成視帝京景物略燕都游覽志諸編較爲賅備數典者多資之第其書詳於考古而略於覈實每有所稽率難徵據非所

以示傳信也朕久欲詳加考證別爲定本方今彙輯四庫全書典籍大備訂譌衷是之作正當其時京畿爲順天府所隸而九門內外並轄於步軍統領衙門按籍訪諮無難得實著福隆安英廉蔣賜棨劉純煒選派所屬人員將朱彝尊原書所載各條逐一確覈凡方隅不符記載失實及承襲謬舛遺漏未登者悉行分類臚載編爲日下舊聞考並著于敏中總其成每輯一門以次進呈候朕親加覽定使天下萬世知皇都閎麗信而有徵用以廣見聞而供研鍊書成後並卽錄入四庫全書以垂永久其如何釐定章程發凡起例之處著于敏中等悉心酌議以聞○諭軍機大臣等溫福阿桂等奏據糧員稟報賊番滋擾並接劉秉恬札稱見將登春所有之兵前往接應等語賊番既有搶占之事不可不卽奪回今劉秉恬業已親往該處溫福阿桂又均撥兵派令大員帶往協剿其

事諒無難辦海蘭察一到自能上緊攻奪儻海蘭察攻打喀措時日溫福不妨留兵昔嶺等處牽綴賊勢暫緩該處進攻卽親身馳赴底木達奪回碉寨剿淨賊番溫福等當就見在情形妥酌辦理再原調之黔兵二千見經劉秉恬調取自應卽令馳往此兵一到交與海蘭察帶領攻剿事竣之後卽歸溫福一路應用又昨續調之黔兵一千亦令赴溫福軍營是溫福一路計已添兵三千足壯聲勢其阿桂奏調之雲南兵二千徑赴豐昇額軍營湖廣兵二千徑赴阿桂軍營兩路俱添有新兵自更易於集事所有沿途應付事宜著富勒渾卽速妥協經理以利遄行至董天弼屢經獲罪經朕棄瑕錄用今伊擅離專駐巡防之地回至美諾翼航安逸其情實爲可惡董天弼卽著革職拏問派委妥員解京治罪○乙巳阿桂明亮等奏據查禮稟稱喇嘛寺糧臺被賊圍陷底木達布朗郭

宗傳聞亦被賊占總督劉秉恬於水波地方遇賊對敵不能取勝等語隨飭伍岱帶兵星赴美諾明郭宗等處相機夾擊並迅速開通溫福劉秉恬兩處軍臺又報諭軍機大臣等底木達布朗郭宗兩處果爲賊番侵占海蘭察一到自必奪回並卽通道安臺其事爲見在第一要務若尙未辦妥阿桂卽親自領兵馳往底木達將此路迅速籌辦萬全再辦進攻至底木達失事皆董天弼辦理不善所致但劉秉恬在彼不早查參亦未免失之大意溫福等向後益當加意經理於軍務方爲有益其喇嘛寺糧員被賊傷害俟此事完後再行咨部查明議卹○丙午諭昨據阿桂奏接准劉秉恬初二日來札稱據布朗郭宗糧員稟報昨夜三更時有賊人襲占底木達等處董提督見住官寨未知下落當經撥兵飛赴策應同日又據溫福奏接據稟報隨派撥官兵令海蘭察等就近前往保

護糧臺上緊籌辦等因本日又據海蘭察劉秉恬各奏到已將簇
拉角克賊人擊退見在帶兵赴喇嘛寺底木達一帶剿賊收復等
語金川賊人敢於乘夜前來搶占底木達布朗郭宗實爲可惡可
恨但此等不過零星賊匪見董天弼毫無準備遂爾乘勢滋擾本
不成事體見今溫福阿桂兩處各派兵飛赴剿擊新調黔兵亦陸
續前往自無難剋日剿滅無遺至董天弼係特派在布朗郭宗一
帶防守大員乃昨據溫福奏先聞伊退住美諾經溫福嚴飭檄催
始於五月二十四日從美諾起程回駐不閱數日該處旋即有事
今復據劉秉恬奏查詢該處被賊緣由竟因董天弼並不在官寨
駐守嚴防卻自住一小營以致賊人窺覘空虛乘便肆其搶占是
董天弼之怯懦玩誤實爲罪不容誅昨已降旨將伊革職拿問據
奏見在不知下落卽或事急自戕或竟爲賊所害亦屬死有餘辜

其子並應查拏交部治罪所有原籍及任所貲產從前曾加恩賞還者仍著嚴行查抄以示懲儆至此次賊人侵擾原屬猝不及防其疏忽尙不足爲劉秉恬責惟董天弼本屬罷輟無能之人前經切諭劉秉恬令其留心查察儻不實心任事卽行據實參奏治罪乃董天弼始則擅離防守之地退居美諾溫福處尙知其行爲劉秉恬豈漫無見聞迨經溫福飭責移往底水達又不在官寨駐防另立一小營安住以致被賊乘閒襲占董天弼種種乖方劉秉恬因何均不早參奏該督之咎實在於此劉秉恬著交部嚴加議處○戊申欽差內閣學士博清額署四川總督富勒渾奏初七日臣等抵明郭宗查此一帶糧站已被賊番阻截又據報阿思通科多郭橋各處營卡俱被賊搶占崇德亦有賊番滋擾臣博清額卽帶兵三百先赴美諾策應臣富勒渾在明郭宗竭力防範諭軍機大

臣等博清額富勒渾奏賊番竟敢如此肆擾實爲可恨雖有海蘭察等在彼尙恐未能迅速妥辦前已有旨令溫福阿桂留兵在當噶爾拉昔嶺各處牽綴賊勢溫福阿桂卽速馳赴底木達一帶上緊克復若不將此一帶勦辦全完亦斷不宜輕進而於美卧溝斷賊歸路尤爲第一要務海蘭察等必須選派勇幹將領擇精兵五六百名實力堵禦至溫福阿桂旣移兵回擊底木達一帶之賊其昔嶺當噶爾拉等處賊眾斷無不知或因攻擊稍疏賊卽將此兩路守拒之眾撤回底木達等處添助勢力或卽於向來進攻之處乘閒出而滋擾更有關緊至新添黔兵源源而進已與伍岱會合卽當通知海蘭察將自明郭宗至登春之賊先行勦除使簇拉角克一帶略無阻滯將此一併傳諭知之○己酉督理糧餉山西巡撫鄂寶奏據卓克采站員稟稱六月初一日賊番從大板昭山口

下來搶卡五處初二日竟將大板昭營盤搶占臣卽馳回覺水交督率防察諭軍機大臣等賊番搶奪大板昭卡座營盤正與底木達等處失事時日相同是賊番竟敢設心截我後路搶劫糧臺尤堪切齒大板昭一帶距黨壩較近今賊旣至小金川則黨壩一路尙非要地著傳諭五福卽速帶兵馳赴大板昭並諭卓克采土司派撥兵練堵禦賊番歸路勿使仍由此路竄回並著溫福等選派勇幹將領帶兵馳往大板昭堵截賊番去路勿使外軼總計賊眾安得如許之多必係將三路要隘守拒之賊潛行撤回應用見據豐昇額等奏初五日午間賊番連放數槍疑其或有埋伏夾壩暗號等語是必抽減各路賊眾同往底木達一路或竟將空寨棄讓否則看守亦必疏懈豐昇額等原不妨乘便奪據爲得寸則寸之計但不宜輕於深入俟雲南新調之二千兵全到軍營再籌進取

○庚戌諭軍機大臣等富勒渾奏言崇德功噶爾拉一路當乘賊番未集帶兵進攻已飛咨博清額伍岱兼程前進與劉秉恬會合其末起黔兵擬留駐明郭宗守禦所辦甚是此時開通臺站使各路聲息相通最關緊要而嚴守明郭宗使賊番無從窺伺亦爲扼要先務今惟富勒渾一人在彼尙恐難於兼顧文綬見在桃關距明郭宗不遠卽著馳赴隨同籌辦一切文綬伍岱均著賞授頭等侍衛至豐昇額奏令五福帶兵由大板昭徑進之處昨聞大板昭失防已諭令五福帶兵往彼今思此路亦關緊要五福恐尙不足恃莫若留舒常於宜喜日旁等處牽綴賊勢豐昇額卽帶兵一二千馳赴大板昭令五福爲領隊大臣統率前往至溫福阿桂聞賊如此滋擾自必迅赴該處剿擊一面選派將領於美卧溝斷截賊番歸路並一面派人堵截大板昭之路而兩將軍分兵接剿喇嘛

寺帛噶爾角克一帶占據臺站之賊隨即分勦底木達布朗郭宗
兩處侵據官寨之賊果能似此嚴密布置賊必全數就殲不能漏
網惟富勒渾摺內稱沃克什土司言明郭宗後山寨落各番均帶
器械聽候賊番調遣等語此或係土司氣餒心疑草木皆兵之說
富勒渾總以靜鎮爲主斷不可略涉驚惶但番性反覆不常觀望
無定亦不可不防其漸將軍等當設法曉諭各土司令其深悉底
裏不致爲賊搖惑至富勒渾等處亦當照此諭示並當令沃克什
知之再豐昇額領兵前赴大板昭其後路糧臺著鄂寶實力設法
接續濟用毋稍延誤○辛亥諭見在征勦金川尙需兵力著挑派
健銳營滿洲兵一千名火器營滿洲兵一千名前往進勦所有派
出官兵應得之項速卽照例辦給色布騰巴勒珠爾著加恩仍爲
固倫額駙授爲參贊大臣帶兵前往富德見係三等侍衛著授爲

頭等侍衛領隊行走此次挑兵著留京辦事王大臣會同額駙色布騰巴勒珠爾並該管大臣挑選其領兵侍衛章京等卽著詢問該管大臣等視其漢仗好曾經歷練者挑取派往至於兵丁行走以二百名爲一起其於何日起程之處著王大臣等卽行酌擬具奏額駙色布騰巴勒珠爾富德於挑兵事竣後速赴熱河請訓再行前往○海蘭察奏六月初七日夜聞德爾森保等木柵已爲賊踞卽趕回水果木大營將軍溫福議暫撤昔嶺附近之兵移防後路乃綠旗兵一聞此信卽棄營私遁初九日東北木柵被賊奪踞初十日後面木柵亦被搶奪溫福隨率臣乘賊占踞未定帶兵攻擊綠旗兵紛紛敗亂忽有賊千餘直犯溫福臣迎上鏖戰而溫福胸左著槍殉節賊眾卽入大營放火臣帶滿兵越過山溝夜半始至功噶爾拉牛天昇營內十一日帶功噶爾拉之兵行至崇德亥

刻劉秉恬亦從登春奔至十二日行至美諾會博清額伍岱和隆武籌議一面開通將軍阿桂後路一面從美諾至巴朗拉添兵固守諭軍機大臣等溫福失事皆爲綠旗兵所誤去年春朕已派健銳等營精兵數千備調因溫福阿桂奏以京兵較綠旗兵費幾數倍朕爲其說所游移遂爾中止今事已如此悔亦無及見降旨選派健銳火器營兵各一千黑龍江吉林兵各一千卽日分撥起程令色布騰巴勒珠爾以固倫額駙爲參贊大臣統領前往竟須另整規模迅圖進剿此時海蘭察已與劉秉恬富勒渾會合一處惟當示以鎮靜卽將美諾至明郭宗一帶辦理周密其餘各緊要處應開通者迅速開通應剿殺者盡力剿殺總須占住小金川沃克什地方整頓兵眾鼓勵士氣以期另辦阿桂聞賊猖獗自必統領大兵撤回殺賊止須阿桂與海蘭察等會合大局卽定至溫福軍

營綠旗兵盡皆潰散實堪髮指若不將倡首及附和者正法多人
軍律安在但見在軍營尙未甯定阿桂當留心查察此時且不必
宜露至於宜喜一路留舒常帶兵駐守豐昇額卽由該處徑往阿
桂軍營會商妥辦其黨壩一路仍令五福帶兵千餘在彼防守堵
截再貴州續調之一千兵雲南續調之四千兵又今日續調之陝
甘兵二千到川境後應赴何處或在何處暫住聽調卽著阿桂通
盤籌畫檄知帶兵將領遵照而行至文綬已授爲頭等侍衛應卽
馳往明郭宗妥爲幫辦○諭博清額卽留川省軍營授爲領隊大
臣領兵行走春甯特成額俱無庸回京交阿桂酌令領兵行走○
壬子諭軍機大臣等前令德爾森保駐紮木果木北山梁因此處
係將軍後路防守賊番潛出截後甚關緊要曾經降旨詢諭而賊
番竟爾突出致將山梁奪占德爾森保所司何事先旣未能瞭望

賊蹤豫報將軍防範而於賊番奪占之時德爾森保如何抵敵海
蘭察摺內雖未提及諒無不知領隊等帶兵征剿規避亦所常有
著阿桂詢問海蘭察據實奏聞○癸丑諭前據將軍大學士溫福
奏接劉秉恬札知六月初一日夜三更時有賊人從美卧溝襲侵
底木達等處董提督不知下落當經溫福撥兵一千名令海蘭察
飛赴應援嗣據海蘭察奏報初十日卯刻賊從水果木山後猝至
溫福軍營綠旗兵紛紛潰散溫福隨帶滿洲兵百餘人迎擊殺賊
數人身受槍傷陣亡等語實爲駭異上年攻克小金川時逆酋僧
格桑竄往金川將軍等統兵進剿念軍營後路最關緊要特派董
天弼於底木達布朗郭宗等處駐守並巡防美卧溝一路要隘其
溫福所攻昔嶺之水果木後山梁派有侍衛德爾森保帶兵駐守
乃先據溫福奏董天弼寬退往美諾經溫福嚴札飭催始回駐底

木達仍另立一小營居住不閱數日致賊覘其疏懈得肆侵擾而德爾森保自移駐水果木山梁後其作何巡防之處並未有隻字奏及可見其全無設備致賊眾闖入溫福軍營是溫福之失事實由董天弼德爾森保二人所誤董天弼死有餘辜德爾森保亦罪無可逭見在查明另辦至溫福軍營綠旗兵一見賊至盡皆奔潰實堪髮指見已有旨令劉秉恬富勒渾等逐一嚴查倡首及附和之眾盡法誅戮以肅軍紀而示懲儆總之此次潰變皆由未用滿洲兵致軍營無可倚仗遂爾僨事去年朕原已派健銳等營精兵數千備用因溫福阿桂奏京兵較綠旗兵費幾數倍朕亦爲其說所游移因而中止亦事機合有此小挫以致如此悔已無及見在選派健銳火器營兵二千吉林黑龍江兵二千伊犁厄魯特兵一千簡勵將士用壯軍聲今據阿桂奏見在派兵防守殺賊多人並

設法將叛逆降番羈其頭人殲其醜類勦清後路軍營軍心鎮定一切儲侍充裕鉛藥敷用等因一摺所辦深合機宜實爲嘉慰著卽命阿桂爲定邊將軍另整規模俟京兵到齊後另籌進勦務須掃蕩賊巢擒殲兩逆以雪憤恨而申威令至溫福自統兵進勦以來身先士卒奮勇殺賊忠盡可嘉方盼其勦洗金川擒俘逆豎以膺茂賞不料功屆垂成倉卒遇變臨陣捐軀深堪悼惜溫福著賞給一等伯爵世襲罔替入祀昭忠祠並賞銀二千兩治喪其應得卹典仍著該部察例具奏伊子永保隨侍軍營見其父受傷能奮不顧身射賊救護搶奪父屍以致得有石傷甚可嘉憫卽著承襲伊父伯爵所有臨時捍衛將軍力戰陣亡之將弁兵丁及跟隨將軍遇害之官員已有旨令阿桂等查明分別議卹至僧格桑以服屬土司敢於抗拒王師已屬罪大惡極乃於噉走擒誅之後復敢

潛回故地煽惑降番肆侵擾尤爲罪惡實盈其父澤旺本係大逆例應緣坐正法之犯今春械送京師以其衰老待斃且因僧格桑負罪潛逃是以不卽正法今僧格桑如此肆逆其父斷不應稍稽顯戮著交刑部卽將澤旺凌遲處死懸首藁街以彰國憲將此通諭知之○諭浙江按察使郝碩著馳驛前往四川幫辦一應軍需事務其按察使事務卽著徐恕暫行署理○諭大學士劉綸品行端醇學問博雅久直禁廷簡畀閤務勤勞夙著倚任方殷今春偶患腮頰浮腫卽派御醫診視並令加意調攝入春以來慮其未能輕減屢差侍衛存問嗣聞其體氣虧弱特賜人參俾資培益用冀速痊昨以重受暑風復加沈劇倍增廬念茲聞溘逝深爲悼惜著加贈太子太傅入祀賢良祠其任內革職降級之案均予開復並賞銀一千兩辦理喪務並派皇十二子帶領侍衛十員往奠茶

酒所有應得卹典仍著該部察例具奏尋予祭葬諡文定○甲寅諭小金川逆酋僧格桑侵占底木達等處並擾及木果木軍營之事昨已有旨通諭矣至溫福軍營失事其罪不在劉秉恬而小金川一帶後路不能妥密豫防及不查參董天弼之處劉秉恬實不能辭咎本年春間因將軍等分路進攻金川所有美卧溝等處通連賊境要隘隨諭令劉秉恬在美諾彈壓又令其移駐簇拉角克往來巡防若果兵少不敷防守卽當早奏調兵今賊人仍從美卧溝潛出侵擾則劉秉恬所設法嚴防者何事又前令董天弼於底木達布朗郭宗駐守並巡防美卧溝一帶又以董天弼懦弱無能復交劉秉恬隨時查察儻不實心出力卽據實嚴參治罪乃前據溫福奏董天弼退住美諾冀耽安逸經溫福嚴飭札催始回底木達其另立一小營並不在官寨駐守不閱數日旋致失事則係劉

秉恬於事後始奏明者溫福身在軍營攻勦尙知董天弼措置乖方之處卽行飭責劉秉恬近在簇拉角克豈轉毫無同見何不早爲參奏則該督之駐彼經理又屬何事此次賊匪滋擾皆由董天弼玩誤所致實屬死有餘辜而劉秉恬之罪亦與董天弼相去無幾前因劉秉恬在軍營督辦糧運諸務頗能奮勉出力不辭勞瘁是以加恩授爲總督並賞戴孔雀翎晉階太子少保今以防守後路緊要大事貽誤若此實不能復爲寬解若不加以懲儆轉似朕有意曲庇何以服衆人之心卽劉秉恬自問亦何顏復戴花翎忝任總督乎此若在他入卽當重治其罪第念劉秉恬係初經任用之漢人且平日辦理他事尙屬認真姑從寬典劉秉恬無庸俟該部嚴加議處卽將伊總督及所加宮銜槩行革退拔去孔雀翎以示炯戒仍加恩賞給按察使銜在軍營隨同辦事俾勵後效所有

四川總督員缺卽著富勒渾調補在美諾等處辦事照劉秉恬例用欽差大臣關防文綬去年獲咎之由係沾染外省袒護惡習尙無大罪在當時不得不加以創懲念其向來頗能辦事尙可棄瑕錄用文綬著加恩補授湖廣總督仍照富勒渾之例署理四川總督印務在省辦理地方事務如有關繫軍需之事仍著往來查辦其湖廣總督印務仍著陳輝祖暫行署理至此次富勒渾本因查辦糧運出口繼以山水漲發留駐督辦橋道一聞賊人侵占底木達之信卽帶領頭二起已到黔兵馳赴蒙固橋策應防守料理俱能妥協博清額係派往審事之人亦卽同富勒渾帶兵馳守蒙固橋彼時賊勢鴟張若非富勒渾博清額二人統兵在彼防範更不知成何事體而博清額旋卽前往美諾與海蘭察督兵聲援連日海蘭察奏到諸摺具有條理必係博清額爲軍機章京辦事年久

熟習機宜故能周到若此富勒渾博清額均屬可嘉俱著交部議敘博清額並賞戴孔雀翎朕於諸臣功罪辦理一秉大公至軍旅重務賞罰尤不肯絲毫假借輕重權衡悉視其人之自取將此傳諭劉秉恬使知感愧並通諭中外知之○諭軍機大臣等據海蘭察等奏稱美諾南山一帶見已派兵前往分別剿撫道路易通等語是南山一帶之路此時自己開通惟北山科多新橋等處賊眾甚多且係阿桂後路最關緊要須即將此一帶賊番盡行剿滅並卽速赴底木達布朗郭宗兩處上緊克復乘賊番占據未久攻之尙易偪令賊酋勢迫仍竄回金川可先清小金川地界將美臥溝大板昭等要隘選派將領分撥重兵防守並將沃克什至卧龍關一帶後路防範周密官兵卽可於小金川地方暫行屯住爲另籌進剿之計又富勒渾已實授四川總督自應回至美諾明郭宗等

處總辦一切其巴朗拉一帶或令博清額或令劉秉恬前往妥協辦理○乙卯諭軍機大臣等昨豐昇額奏番人供詞有索諾木帶兵由噶拉依往巴旺布拉克底之語其地爲阿桂軍營後路且與章谷一帶相近所關甚重不可不留意稽防再當噶爾拉軍營著明亮留兵防守若其地非多兵不能據扼卽當令明亮統兵駐僧格宗與美諾爲犄角之勢則當噶爾拉一路賊自無從竄入卽達烏至章谷一帶亦可控制無虞阿桂當就該處情形悉心籌畫又昨據劉秉恬奏水果木軍營民散在前兵潰在後究係未能先事豫防所致且營中槍礮火藥若早派重兵嚴守礮局何至爲賊搶劫而客民匠役數千亦當收之營內備人數以助軍威未爲不可不應堅閉營門聽其散去旣示賊番以弱且徒搖惑眾心是溫福未免倉皇失算至其營中兵眾不下一萬數千當時潰散若干著

交阿桂卽行確查具奏再將領中實係陣亡與巴朗相似者均應
奏聞予卹其隨將軍衝出之滿洲兵一百名有陣亡者亦一體查
明議卹若所列未出人數內或有蹤迹未明不能定其存亡者亦
開具姓名奏明交部備覈○丁巳諭據阿桂奏於當噶爾拉至章
谷後路一帶將小金川精壯男番殲滅礮寨盡行燒毀並派兵在
達烏翁古爾壘等處防剿其色木則一處令奎林崔文傑堵截撲
殺多人又添兵防護納圍糧站將河以南之拉約寨痛加剿戮焚
燒寨落並殺死金川賊人又令崔文傑攻剿僧格宗對河之榮寨
殺賊五六十人焚燒碉房三四十座其餘寨男番俱經洗盡金川
遣來之賊三起並皆擒殺卽日與海蘭察等會合剿除河北之彭
魯爾等寨則美諾一帶之餘孽便可埽清等語阿桂所辦甚合機
宜且殺賊甚多殊屬可嘉著交部議敘所有在事出力之將弁兵

丁等並著阿桂查明咨部議敘以示鼓勵○諭富德著授爲領隊大臣帶領頭起兵丁前往四川軍營其末起兵丁著派藍翎侍衛訥蘇肯帶往